

Fundacion Bon Nochi Drumí Dushi

Quiz di lesamento ta sigui cu scolnan special

ORANJESTAD – Fundacion Bon Nochi Drumí Dushi (FBNDD) ta sigui cu e segundo rond di quiz di lesamento. Den e rond aki Scol Paso pa Futuro y Emmaschool tin cu demostra cua di nan a lesa e buki ‘Bencho ta gana un bais’ di escritora Olga Buckley cu mas atencion.

Segun e fundacion den planificación di e quiz pa scolnan basico a incorpora un fase di tres tanda bou di e tres scolnan di enseñansa special. Meta di e quiz ta pa ofrece e alumnonan di grupo 6 y 7 di scol special, cu pronto lo pasa pa enseñansa avansa, un forma creativo pa analisa un buki y profundisa riba su contenido. Directiva di FBNDD ta motiva e docentenan di grupo 6 y 7 pa lesa e buki cu tur mucha y asina forma un grupo mas grandi di lesado pa e buki cu lo wordo trata durante e quiz. Cada scol ta participa cu un di team di 6 alumno. Un cuerp di hurado hopi experiencia riba tereno di literatura hubenil ta dicidi riba e resultado di e quiz.

Parti den seccion
E Quiz di lesamento ta parti



den 4 seccion. E prome parti, “Bruha lenga”, ta un introduccion y no ta conta den e puntuacion. Den e di dos seccion e participante mester resolve algun charada y dra-

matiza cierto parti di e buki. Den e di tres seccion e participantenan mester defende nan conocimiento di e buki cu nan a lesa y di e biografia y bibliografia di e autor. Den e



di cuater seccion e escritor di e buki ta intercambia ideanan cu e muchanan participante y e publico presente. Pa e prome tanda Scol Caiquetio y Scol Paso Pa Futuro a competi cu otro riba nan conocimiento di e buki Isla di Mosa di autora Desiree Correa. E competencia tabata hopi preta y tension tabata halto. Finalmente Scol Caiquetio a logra acumula e cantidad mas halto di punto pa gana e prome tanda. Dominio di contenido di e buki y e habilidad di e participantenan pa formula nan contesta correctamente a resalta grande-

mente. Banda di e hecho cu nan a preparara hopi bon, e bentaha di instruccion den nan lenga materno na scol, tabata remarcabel. Por a nota cu e participantenan di ambos scol tabata sinti nan mes na smak, segun e fundacion.

E di dos tanda lo tuma luga dia 27 di februari entre Emmaschool y Scol Paso pa Futuro y di tres tanda na mei entre Scol Caiquetio y Emmaschool. E puntonan ta sigui conta y na final di e di tres tanda lo conta tur punto pa saca e ganador y e dos finalistanan. □